

第十九冊

忠蓋
敬信

清稗類

商務印書館發行

清稗類鈔

忠藎類

杭縣 徐珂 仲可

洛翰削指衛上

太祖創業之初。有洛翰者。本劉姓。以傭至遼。初給事建州。頗勤儉。有勇力。拔爲侍衛。覺羅某叛。夜懷刃入太祖寢帳。洛覺以手格之。四指皆落。卒衛上出。後猶能執銳禦敵。太祖嘉之。倚如左右手。卒於起義之前。故不得預五大臣之列。其裔後隸內務府。

揚武勳王因公致命

揚古利以開國功。封武勳王。尙主爲異姓臣冠。晚年從太宗征朝鮮。大捷。後巡視山谷。大霧中伏弩。遂致命焉。

費英東額亦都世篤忠貞

異姓勳臣。以滿洲信勇公費英東宏毅公額亦都爲最著。信勇公子昭勳公圖

賴。宏毅公子忠義公圖爾格。又能世篤忠貞。兩世皆侑食太廟。

范忠貞不屈於耿精忠

康熙初年。撤藩議起。吳三桂反於滇。閩藩耿精忠遙應之。巡撫劉秉政降。精忠環兵刃。脅總督范忠貞公。范挺身前。嚼齒大罵。精忠執之。復使秉政往說。秉政時已爲僞樞密使。范蹴之仆地。笑曰。逆賊分卽死。予先禡其魄矣。精忠見范無屈意。乃使人問曰。聞公昔與水月和尙遊。和尙何言屬公邪。范叱之曰。吾家世讀孔孟書。忠孝大節。豈死生所能奪。卽彼緇流稍有識。亦必以忠孝勸人。豈肯妄言禍福。歸語爾主。善自爲計。無自取族滅也。

耿精忠母責子受僞命

耿精忠母周氏。賢母也。當滇氛初起。精忠密受僞命。周氏屢責不悛。卽憤鬱絕食而死。范忠貞公往唁之。

甘忠果殉藩亂

甘文焜。遼東人。康熙壬子。爲雲貴總督。吳三桂反。致書貴州提督李本深。慷慨

數千言。約共勦禦。而本深以安順應賊。甘知貴陽時總督不可守。遂馳下鎮遠。殺其妾以饗士。冀招楚兵扼隘。而副將姜義先已從賊。甘知事不可爲。乃自縊於吉祥寺。事聞。贈兵部尙書。諡忠果。

葉映榴罵賊自刎

康熙乙丑。裁湖北總督缺。及其標兵。楚兵故剽悍。有夏逢龍者。尤桀黠。裁檄下。向巡撫索月餉。不得。則聚衆謀山中。將爲亂。武昌同知某倡議剿捕。衆益怒。露刃入轅門。糧道葉映榴急入。白巡撫。請撫之。巡撫出。衆語不遜。冒曰。若欲反耶。衆揮刃曰。反也。將奈何。蜂湧上。巡撫逸。映榴冒刃前。諭以朝廷威德。不應擁歸。逼從逆。瞋目叱之。乘間欲奪刃自刎。衆大呼曰。殺好官。不祥。遂以兵環之。巡撫旣遁。餘或亡或降。賊勢大振。映榴困孤城中。誓一死全志。獨念老母無所託。未卽引決。後謂其妻陳氏曰。以付若。陳慨然曰。夫盡忠。婦盡孝。分也。敢不如命。遂奉姑易服遁。映榴計母妻已出險。迺曰。吾今可以死矣。立繕遺疏。北向九拜。升公座。罵賊自刎。瞋目良久。乃瞑。賊大驚。羅拜而去。

臣民爲聖祖禳疾

康熙癸酉。聖祖有疾。諭諸王大臣修齋禱禳。初僅宗室及滿大臣行之。繼而上自漢六部九卿。下至富商大賈。亦莫不效之。或三晝夜。或七晝夜。或九晝夜。各於就近寺觀設壇以禱。皇城內外。黃冠絡繹。月餘乃止。

顧天成輓聖祖詩

世宗以蔡嵩依附年羹堯。籍其家。得顧天成詠星星草詩稿。疑語涉譏諷。命蔡索全集進呈。則見有恭輓聖祖詩。詩有已過虞舜巡方日。尙少唐堯在位年之句。上淚下。曰。草莽之間。乃有此臣耶。因召入。特賜編修。使直上書房。

朱軾不以疾引去

朱軾以晚歲多病。恩重不得乞身。時方望谿侍郎苞方困於憂虞。屢欲告歸。朱固止之曰。譬如巨室虛無人。雖老疾者偃臥其中。盜賊猶有戒焉。吾輩三數人。尙可以疾自引去乎。言罷歔歔。

李恭勤忠愛

李恭勤公世傑。貴州黔西州人。初爲江南某司巡檢。高宗南巡。司船跳木。時雨後泥滑。上登舟。偶失足。遽起扶之。督撫縛之以請命。上笑曰。此彼忠愛之意也。命立擢知州。後官四川江南總督。以廉能稱。上屢欲以爲閣臣。尼之者言其不由科目。例不可。乃止。

顏希深母爲國爲民

乾隆時。顏中丞希深。官平度知州。于役省垣。州遭大水。城不沒者數版。災民嗷嗷。流冗載道。太夫人聞而惻然。命發倉粟。盡數賑饑。民賴以甦。大吏以擅動倉穀。劾罷中丞官。上覽疏。大怒曰。有此賢母好官。爲國爲民。宜保反劾。何以示勸。立擢知府。並賜其母三品封。爲淑人。

拉傳以誅朱爾墨特扎布而自死

乾隆戊辰。拉忠襄公布。敦奉命與傅襄烈公清同爲駐藏大臣。傳爲孝賢后兄。性忠鯁。其弟文忠公貴。尙於人前呵叱之。西藏達賴喇嘛頗羅鼐新故。子朱爾墨特扎布性兇悍。與準夷勾通謀逆。計日舉事。拉傳密劾之。上命岳襄勤公鍾

琪率兵討之。未至而逆謀日熾。拉傳計曰。語云。千里裹糧。士有饑色。況萬里乎。今賊謀日甚。若不矯詔誅之。使羽翼已成。吾二人亦必爲屠害。而岳公不獲進討。非惟徒死無益。是棄二藏地也。不若先發制人。雖死猶生。繼之者亦易爲力。因矯詔召朱至樓上。宣詔。豫去其梯。朱跪拜。傳自後斷其首。賊圍樓數重。傳遂自刎死。拉揮淚挾刃跳樓下。殺數十人。自剖腸死。事聞。上震悼。均追封一等伯。勅建雙忠祠。

策凌世篤忠貞

雍正壬子。有光顯寺之戰。超勇親王策凌威名鎮漠北。虜騎震懾。不敢南牧。及高宗卽位。授王定邊左副將軍。鎮烏里雅蘇台。傳閣峯尙書歸定和議。上命王會議。虜使哈柳。辯士也。謁王於京邸。謂王曰。聞王漠北有營帳。奚必居京邸。王曰。皇帝都於此。我隨皇帝而居。卽爲吾土。喀爾喀乃藩部。何足道。柳又言幼子思歸。欲傳致之。王曰。公主所育。爲吾嫡長。其餘孽何足齒及。汝部縱放歸。吾請於皇上。必戮於宗也。哈喀然退。王復面奏高宗曰。今北虜挾臣子以爲重。臣若

許之。適足以長其驕心。恐無益於國事。況此子不肖。不卽隕滅。赧顏偷生。無足存也。上詔獎之。比之樂羊。復命王修書答之。和議乃成。

王長子成袞扎布。後亦掌定邊左副將軍印。其族貝勒青滾雜卜。因兄額林沁多爾濟故。縱阿睦爾撒納。奉旨賜死。陰煽惑諸喀爾喀蒙古諸藩。曰。元太祖裔。無正法理。謀共叛。檄至王所。王大怒曰。焉有人臣犯而復仇之理。吾家世篤忠貞。豈可自蹈誅夷也。首發其謀。復寄札於哲卜尊丹巴呼圖克圖。令其諭所部。知大義。俾勿惑。事聞。高宗嘉之。卽命王統師勦之。曰。大義滅親。王茂宏所以仗安東節也。王率諸喀爾喀藩部追捕。青滾雜卜計窮。擁兵自衛。王傳檄諸部。宣布國家威德。其黨皆散。惟青滾雜卜父子數人。宛轉沙漠中。迷失道路。爲官兵所擒。上大悅。賜王黃金帶。敕封其子爲世子。

庚午。王薨於軍。遣表請歸附公主園寢。上惋惜之。命配享太廟。及賢良祠。外藩得預侑食者。惟王一人。蓋異數也。

嘉慶甲戌。禮部尙書成寧以王爲外藩。撤賢良祠牌位於後殿。事聞。仁宗震怒。

立禡成職。

瑪木特爲烈士

信勇公瑪木特。額魯特人。初爲準噶爾宰桑。乾隆癸酉。杜爾伯特汗策凌來降。達瓦齊遣瑪追之。旣入邊。復逸出。副都統達青阿誘擒之。高宗諭曰。瑪木特黨召之不至。或至。心懷不服。則擒之可。今遣使往。輒至。不明懲其罪。反誘擒。非也。詔宥罪。遣歸。給衣冠。瑪感上恩。稽首而還。後我兵入。瑪感前事。且念達瓦齊不足事。乃赴副將軍薩拉爾軍。請內徙。入覲。上念其誠。授內大臣。時議征達瓦齊。以阿睦爾撒納爲左副將軍。以瑪爲參贊。瑪密奏曰。阿睦爾撒納豺狼也。往必爲殃。上以不逆詐諭之。軍抵伊犁。瑪多贊畫功。封三等信勇公。賞雙眼花翎。四團龍服。命守札哈沁。以疾留伊犁。阿叛。爲逆黨所擒。阿慰之曰。準噶爾與天朝疆域殊異。爾欲內向。何也。不如歸我。當善視之。瑪怒。唾而言曰。天下豈有無君之國哉。達瓦齊篡虐。聖天子討其罪。噶爾丹策凌嗣已絕。我不內附。將焉往。且天朝已擒我。不卽誅。復釋還。此所謂生死而肉骨也。何忍背之。爾先我往。聖

天子待爾厚。爾乃謀逆。今既擒我。我何懼。死則死爾。大軍至。將磔汝。犬不食爾肉也。阿慚縊殺之事。聞上震悼。御製烈士行以獎之。

鄂剛烈力戰自盡

襄勤伯鄂容安。文端公長子也。家傳方略。勇敢性成。連任疆圉。多所籌畫。乾隆乙亥。偕班第駐守伊犁。值阿睦爾撒納叛逆。力戰自盡。上深軫悼。及閣臣議諡。以其由詞苑起家。議文剛文烈以進。高宗抹去二文字。取剛烈二字以賜。蓋夙知其忠義果毅。不復以常例拘之也。

楊重英節過蘇武

乾隆中葉。廣州漢軍楊重英。官雲南按察使。率兵駐滇緬界上之新街。爲緬人所虜。繫之。而縱其隨員知縣某某等歸國。高宗怒。命執兩員磔諸境上。不許入國界。且諭令滇督。如重英他日歸時。卽照此辦理。重英既被虜。終不入緬都。緬人舍之於新街。欲其降。譬說萬端。卒不屈。重英在新街。先後二十五年。足跡未出闕一步。其眷亦囚之請室。己丑。緬乞和。且值高宗七旬萬壽。始釋重英歸。甫

及境。滇督某違前旨。執而梏之。亟馳奏。時上春秋高。頗悔當時治此案過嚴。乃下詔旌其忠。獎以節。過蘇武。且令滇督驛送來京。預備召見。旨至滇。重英已病卒。重英爲雲貴總督拜滿缺大學士應琚之子也。

馬壯節死木果木難

馬壯節公銓。初中乾隆壬申武探花。因與同僚角觝。罷官。入京營。充武弁。傳文忠公恆倚任之。復中庚辰探花。洊至四川提督。從征金川。時相國溫福擁兵不進。馬慨然曰。金川蕞爾小夷。經大兵兩度撻伐。不能獲尺寸之利。屯駐經年。老師糜餉。安用將帥爲。今相國以台司重臣。不能出險用奇。使彼畏威革面。惟置酒高會。撻辱士卒。將何歸報天子。溫斥其妄。其後木果木之敗。馬殿後隊。手戮數十賊。力盡死焉。

溫福陣亡於大金川之木果木

乾隆癸巳。溫福以定邊將軍征金川。陣亡於木果木。時總兵宋元俊方乘勝直搗美諾。若厚集兵力。一鼓殲滅。金川可定。溫乃狃於易勝。不復檄調各路兵馬。

惟日與提督董天弼輩置酒高宴。額駙色布騰巴爾珠爾屢勸阻。溫乃謂其煽惑軍心。上疏劾之。

護軍統領伍岱。遼東驍士也。見溫所爲。歎曰。吾聞速拙。未聞遲巧。焉有屯兵賊境。而日以宴會爲務。吾固遼海健兒。未審有若此能致勝者。溫大怒。以他罪遣戍。遣綠營兵三五十人取碉卡。有致傷者。溫反責之。人心益懈。超勇公海蘭察至。扣刀誚溫曰。身爲大將。苟安旦夕。非夫也。今師雖老。使某督之。猶可致勝。溫拂袖起。遷延月餘。賊偵官兵弱。乃整勁旅數千東攻。官兵不戰自潰。海初對敵。卽咤曰。雲氣已頽散。不可戰。余馬首欲東。與諸公期會於美諾寨。因馳馬破圍去。

溫方雅服督戰。爲賊所擒。董天弼牛天昇張大經等皆死之。師遂大潰。自相踐踏。終夜有聲。渡鐵鎖橋。人相擁擠。鎖崩橋斷。落水死者以千計。參政明亮方結營美諾。見潰兵如蟻。往來山嶺間。遣人止之。潰兵知明在止者數千。收留犒賞。兵少安。適有持銅匣沃水者。誤落於地。驚曰。追者至矣。羣起東走。勢不可遏。其

喪膽也若此。

楊夢槎殲賊而死

乾隆朝。無錫楊夢槎明府。以孝廉令四川酆都。丁卯。金川酋逆命。調赴前敵。監製礮位。屢有功。癸巳六月。大軍至木果木山。夜半。賊劫礮局。遂擁之去。環叩用礮之法。明府陽教之。而陰詭其製。反裂。殲賊無算。賊酋切齒。剝其屍如泥。事聞。詔贈兵備道。賜祭葬。蔭一子。如其官。

李侍堯處置臺灣

乾隆丙午。李侍堯督閩。時值臺灣之變。高宗以常青非將材。恐不能守。令全師歸。待福文襄王康安至。再籌進取。李以臺爲巖疆。一旦失守。非十萬兵不易取。恐失機宜。節諭旨數語。寄常青。具疏請罪。高宗嘉其忠。以爲處置得宜。有古大臣風。賜雙眼孔雀翎獎之。

壽同春謀復廳城而死

乾隆丙午。會稽壽同春以布衣客臺灣淡水廳幕。值林爽文之變。淡水陷。廳官

及於難。壽展轉賊中。密約忠義士反正。城立復。乃搜捕羣不逞。斬刈無算。而撫定其子遺。調卹備至。威惠大著。草萬言書。渡海達大府。大府疏告。上驚賞。卽命知淡水廳。後罵賊不屈死。事聞。贈太僕寺卿。蔭官立祠。

奎壯烈願馬革裹屍

孝賢后之猶子奎壯烈公林。嘗於乾隆壬子。從福文襄征廓爾喀。疽發於項。仍力疾從軍。孫文靖公士毅往視其疾。執手曰。疾何必問。大丈夫不能馬革裹屍。殲殲床簀。實可醜也。及卒。惟以軍務未歲爲憂。語不及他。奎嘗讀元史。王述菴侍郎問所慕。奎曰。耶律文正非余所及。得及王保保之忠貞足矣。

謝家瓚雪仇報國

謝家瓚。湖南麻陽富室也。居高村。村故與苗接壤。乾隆乙卯。苗民石三保叛。大掠於麻陽。家瓚盡散其家財數十萬。募鄉里壯士禦之。殺三保兵無算。三保深仇之一日。家瓚率衆守溪口。三保驟悉。兵圍高村。曰。出家瓚。乃免。家泰。家瓚族弟也。聞之。挺身出。語村父老曰。賊必欲得吾兄而後快。不獲吾兄。村人必無幸。

矣。徑投三保軍。大罵曰。我卽家瓚也。三保親剗刃家泰胸。剗其皮。家泰罵不絕口。終死。無異辭。三保心以爲信家瓚也。然意猶未饜。復威索村人。獻家瓚妻子。縛以歸。始知所殺者非家瓚。迨家瓚馳率兵歸救。而事無及矣。大憤。於是與三保戰益力。事聞於朝。天子嘉之。予之官。將軍福康安賞伺其罷戰歸。勞之有加。禮。家瓚曰。瓚受國恩。義當爲國家效死戮力。且苗。吾仇也。吾弟死焉。吾家殲焉。瓚自雪仇報國而已。三保旣知家瓚實不死。必欲甘心家瓚。亟攻溪口。家瓚力不支。其下有勸之者曰。賊指名懸購吾子。亟甚。殆難免矣。盍易服而行。以求援也。從之。斃於路。賊退。收其尸。葬焉。

花連布勦苗陣亡

花連布。滿洲人。以世職洊至南籠鎮總兵。性質直。有肝膽。少習左傳。精戰法。乾隆乙卯春。入覲。中途。值銅仁紅苗反。福康安以總督進勦。檄留花連布隨營。素稔其勇。令解永綏圍。乃率百餘騎。長驅直入。破苗寨數十。苗人皆烏合。未見大敵。驚曰。神兵至矣。何勇健乃爾。花著豹皮戰裙。苗人呼爲花老虎。永綏圍解。大軍至。

令花當大營前。結營禦賊。悉以勦事委之。王日置酒宴。雜以歌舞。花晝夜巡徼。饑不及食。倦不及寢。苗偵知王持重不戰。乃一日數至。花竭力防堵。百晝夜。鬢髮盡白。小竹山賊叛。黔督勒保檄其督兵往勦。遇賊山梁上。轉戰益奮。中鳥槍墮山澗中。詬罵不絕口。賊欲鈎出之。乃自轉入巖石中。折頸而死。事定。將弁百計出其屍。顧骨寸斷矣。事聞。仁宗震悼。特賜祭葬。

王文雄爲楚匪支解

嘉慶丙辰春。楚匪滋事。當事者過於持重。遂至蔓延三省。用兵十載。方撲滅。其中殉難者。提督爲王文雄。花連布。富成。穆克登額。總兵爲諸神保。朱射斗。袁國鑽。何元卿。施縉。凝德。札爾杭阿。李紹祖。而文雄死事尤烈。

文雄。貴州人也。由行伍洊至通州協副將。率直隸兵往援鄖陽。陝撫秦承恩性懦弱。不知兵。賊遂入陝境。至盤屋。秦惟閉城哭。日盡腫。文雄倉卒率直兵繞道擊之。陝境保全。事聞。秦受上賞。王累擊賊。賊畏恨之。庚申夏。於棧道中猝遇賊。賊覘知其兵弱。四出紛擊。轉戰竟日。路旣險峻。糧復絕。遂爲賊擒。噴血痛罵。賊

首曰。此手戮吾三十二首領。不可令其速死。乃支解竟日。賊旣退。軍士於草中尋遺骸。一臂而已。事聞。上震悼。賜世襲一等子。

李壯烈以死報國

嘉慶丁卯。蔡牽寇台灣。浙江提督李壯烈公長庚率兵討之。漁山之戰。坐船遭風失信。閩督阿林保遂誣李逃寇。不知所之。賴浙撫阮元以李受傷入告。仁宗優詔獎之。嘉慶丁卯。戰於黑水洋。蔡牽窮迫。以三舟艤島。去李艇半里耳。李因山爲壘。以逸待勞。四面圍之。計日可獲。而閩督飛檄催戰。責以逗撓。幕客勸李封章入奏。李斫舷怒曰。大丈夫以死報國。不受唾面辱也。因整軍進。下令皆持短兵。爲必死計。及戰。浙軍無不一當百。有卒躍登牽船。牽幾被擒。以衆寡不敵死。而牽奴林十狃素識李。潛由篷窗發火槍。中胸。李茹痛呼曰。諸君不殺此賊。老夫死不瞑目矣。長號而終。事聞。仁宗震悼。封一等壯烈伯。諡忠毅。祀昭忠祠。李卒之二年。部將邱良功王得祿等。率舊卒建功海上。時閩督方葆巖制府維甸。與邱王合志殲賊。戴文端公衢享掌樞柄。所請無阻撓。二將得以用命。牽投